



Tir Yimyim


www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



tir yimyim

TAPAK 3



Mirabai Weightlifting World Championships nung masayatsü

Priyanka-i Kerala tsürtem indang saree agir MP tenangzükba agi



VOL. XXII ISSUE NO. 50 (ADOK 50) DIMAPUR ROGONÜ (FRIDAY) YIMPOKSÜI (NOVEMBER) 29, 2024 ₹ 5.00

December 31 matongdangsa eKYC inyakyim ajak renemtsü tuyur

Dimapur, Yimpoksüi/ November 28 (Agencies): Ministry of Consumer Affair, Food & Public Distribution Government of India-i tuyuba ama National Food Security Act, 2013 kübok beneficiary ajaki taküm December 31 tashi nungbosa eKYC inyakyim renemtsü metetdaksür, ta Brihostibarnü Director, Food & Civil Supplies, Nagaland, Dimapur, Chubawati Chang, NCS-i sangdong ka ajanga metetdaksüogo.

"eKYC exercise agiba ya maliba nisungtem- beneficiary süadoker/Aadhaar meshidakba beneficiary ajak züngdoktsü atema lir. Iba mapatong kübok eKYC atema state/linük tesem mashie ka nung aliba Fair Price Shop nungi beneficiary ajaki Aadhaar amshia biometric osangtem jangjatsü. Beneficiary indang pending/non performed eKYC list ji peipei district nung angutsü," ta sangdong nung shia lir.

"Iba dak alia state nung aliba Fair Price Shops ajak dang eKYC

inyakyim metembang tashi dokantem lapoka ayutsü tuyur aser eKYC inyakyim renemtsü asoshi bendanger (tanga states nungi beneficiaries) densema beneficiary ajak nem temelaba agüjang ta tuyur," ta sangdong nung shia lir.

"State ajak nung tesem balala oa mapa inyakterem aser ainlen senzütsü atema timtem ajangshirtem asoshi India sorkari PDS system yanglushiogo, koba ajanga beneficiary temi linük tesem mashie ka nung pai/lai melungba Fair Price Shop nung eKYC renemtsü atema temelaba agütsür. eKYC benokba inyakyimji Ministry-i mapang shia reprangshir aser Department-i tuyuba tashi mangar Fair Price Shops anema inyaksü," ta sangdong nung shia lir.

"Anungji PHH aser AAY schemes kübok beneficiary ajak dang December 31, 2024 anogo matongdangsa eKYC renemtsü tuyur, mesüra parnok indang temedenji tang aliba Ration Cards nungi agientsü," ta kasa sangdong ajanga metetdaksü.

Unorganized sector nung inyaker tetsürtem atema seminar ka agiogo

Kohima, November 28 (TYO): Nagaland nung unorganised sector nung inyaker tetsürtem atema November 28, 2024 nü State Academy Hall, Kohima nung anogo ka seminar ayongzuka agiogo; iba seminar ya Entrepreneur Associates-i ayongzük.

Iba sentong nung state Angh, La Ganesan-i seminar omen "Women Working in the Unorganized Sector in Nagaland: Challenges and Opportunities" nung ajemdaker jembu.

"Asen linük nung loktiliba-rongsenketsüing terenlok tsütsü tetsürtemi kanga tongtibang shilem agir, ajisüaka aiben tim tetushi mangur. Tetsürtem nem tetushi agütsütsü aser tashi agütsütsü atema tanü iba ama seminar ka agiba atema ni pelar," ta metetdaksü.

"Unorganized sector nung tetsürtemi anibelem arema inyaker. Nagaland nung iba sector nung inyaker tetsürtem aiki lir. 2021 küme-Shram portal report ajanga ashiba agi, Nagaland nung nütsüing shilem 8 bo informal sector nung inyaker aser iba nungjagi tetsürtem shilem tesadang dang nungi teimba lir. Item tetsürtemji shilem agirtem dang masü saka pei

kibong mesürtem lir. Item ama tetsürtemi nendaka inyakba ajanga asen state aser linük nung loktiliba-rongsenketsüing nung temelenshi adokdaksür," ta pai ashi.

"Informal sector nung inyakteremi ajangshiba timtem balala asenoki meteta lir. Mapang shidak nung sen mangur, infrastructure teyari peria mangur aser financial services peria manguba ama tetsükdaksü balala agientsü nungdak. Tanü ama seminar ayongzuka agiba ya 2047 küm tashi nungbo India ya terenlok linük ka akümtsü nükjidong yur inyakba den sendaktepa lir," ta pai metetdaksü.

"Tanü ama seminar ya timtem balala bentettsü, shisa lemsateptsü aser welfare schemes aser maangka balala metetdaksüba ajanga tetsürtem nem tashi agütsütsü asoshi tongtibang sabang ka lir," ta pai ashi.

Angh-isa ajak dang item ama mapatongtem nungittsü, unorganized sector nung inyaker tetsürtem nem maangka agütsütsü aser tetsürtemi inyakba mapa ajak agizükteta asen loktiliba yangertsü atema inyaksü ayongzük.

Ungma yimteni Aotsür-Aor sensamasatsür aputsü mepishir



Dimapur, November 28 (TYO) : Tawa nisung kari alima nung osangtsüsang prokba 'social media' ajanga Aotsür ajunga jabujaritsür kümja tenükmenüksüba aser Wb. S.C.Jamir-bo Naga nungger senso masü ama kümja sensamatsüba nisung ya bushia aputsüla aser memenui tapet mapa inyaktaksünar ta sangdong ka ajanga Ungma Village Council aser Ungma Senso Telongjem Dimapur nati state government dang mepishia metetdaksüogo.

Iba ama Aotsür Aor mezüngmeshia alima dang sandongba ken o ya bushitsü atema November 27, 2024 nü

Dimapur nung Ungma putu menden aser Ungma Senso Telongjem Dimapur na telongjem senden ka amenba mapang iba osang ya state government nem nenshia metetdaksütsü lemtet.

Iba ama kin ka mezüngmeshiba ken o mebushii toktsüba ya tebilemtsü tulu lir aser onoki mangu aser memetet amabo medoktsütsü ta parnokisa metetdaksü. "Iba yabo nisung ka mezüngmeshiba mapa dangbo masü, ibai lenir tajung sensamatsüba aser Aotsür aküm aser Ao kin luja ajemshiba mapa ka lir. Iba ama ken o menua mebushii yutsüba yagi teinyaksü mapa ka meinyaki toktsüba dang

masü saka iba ama kin ka luja mezüngmeshiba mapatem ya inyaksü temelaba agütsür asütsü. Iba ama ken o tamajung prokba ya menua mebushii toktsüba ajanga asenok loktiliba nung tamajung atalokyonga aotsü, " ta Ungma yimtenisa shisabolua metetdaksü.

"Ozü nübor aküm kümzüka ayutsüba mapa nung temulungtetba tulu agi Ungma village council temaba yimten tashi den Ungma Senso Telongjem Dimapur dena akanga nokdaksü aser iba ken o ya tatem tashi bushitsü," ta kasa sangdong nung nung parnokisa metetdaksüogo.

Chief Minister Rio-i Kohima nung YES Coffee Corner semzüksü

Kohima, Yimpoksüi/ November 28 (TYO): Brihostibarnü Chief Minister, Neiphu Rio-i V. Kets Ki, 62'C Khikha, Riileizou Colony, opposite RBI, Kohima nung YES Coffee Corner semzüksüogo.

YES Coffee ya Yahweh Empower Stature (YES) Agro Park product lir aser kiburji Kohima district kübok Gariphme yimdak Vibeilietuo Kets meyong lir.

YES Agro Park ya 2018 küm amenoka liasü aser tang YES Coffee ta ser tenzüker.

Iba sentong nung jembidang Chief Minister Rio-i, küm aika tejaklen Nagaland nung coffee tsünüba tamakok nguba sülen sendoka liasü, ajisüaka tawa-

tanü nüburtemi ano tejangraba tulu nung asentenshir coffee lu yimteper, ta metetdaksü.

Paisa, Nagaland nung land resources department-ia state tesem aika nung coffee corner amenokogo aser raliwalirtemi Naga nungger coffee ronem sapur, ta metetdaksü.

"Nagaland coffee-i silver medal angu, iba sülen gold medal nguogo," ta pai ashi.

"Department-i state nung coffee lu ayimertem kanga ajungmesor. Asenoki alu ayimtsüla. Asenoki training agitsüla aser asen sasa ajak inyaksüla. Business nungbo ajakji tetoktepba lir, anungji kanga meranga aser aremzüka inyaksü nungdak," ta pai ashi.

YES Coffee Managing

Director, Thejanuo Kets-i, YES Coffee Corner ya November 29 nungi tenzüksü aser Amongnü anogotem dak alaka anogo shia anüngdang 12:00 ako nungi aonung 7:00 ako tashi lapoktsü, ta metetdaksü.

Kasa sentong nung Pastor CRC Pezielietsie, Kohima, Letuolie Pienyii-i Tsüngrem temoatsü meshia sarasadem aser Naga Idol 2007, Ruokuovotuo Pfiisenuo-i ken ka aten.

Iba sentong nung Land Resources Department Advisor, G. Ikuto Zhimomi, Chief Secretary Dr. J. Alam, Commissioner & Secretary for Land Resources Kevekha Kevin Zehol nungger densema tongti ketdangsertem aika dena liasü.

Kohima DC-i traffic temzüng kar sangdonger

Kohima, November 28 (TYO): Kohima nung December 1 anogo nungi tenzüka December 10 tashi Night Carnival ayongzuka aliba dak sendakba nung Deputy Commissioner Kohima, Kumar Ramnikant, IAS-i gari senzüsembongba dak sendakba tetuyuba kar agütsüogo.

December 1 nungi tenzüka nikongdang 4:00 ako nungi aonung 9:00 ako tashi New/Old NST lenmang adena Phoolbari Junction (South) nungi Razhu Point (North) tashi senzütsü memelatsü.

Dimapur nungi atuba garitem Tseminyu, Wokha, Zunheboto, Kiphire, Phek aser tanga district temi aotsü süra NH-29-IG Stadium By-Pass Road ajanga senzütsü akok.

Kohima town nung Light Medium Vehicles (LMVs)/Two-Wheelers garitemji Y-Junction-Post Office - Khuochiezie (local ground) - Razhu Point ajanga senzütsü.

BOC/PR Hill nungi aluba City Buses aser Bus ajakji Y-Junction - Post Office - DC Office - Assam Rifles Gate - Ao Church

leni yoktsü aser kasa lenmang ajanga BOC/PR Hill-i meyiptsü. Passenger temji local ground gate anasa anizüksütsü/anikettsü.

High school tsütsülen nungi Razhu Point tsütsüleni atuba bus ajak Razhu Point junction nung alongtsü aser High school tsütsüleni meyiptsü. Passenger temji Razhu Point nung anizüksütsü/anikettsü.

Departmental bus ajaki temalen bus senzüsempoing atema tuyua aliba ama senzütsü akok mesüra NH-29-IG Stadium By-Pass Road adena meyiptsü akok.

Shillong nung Aotsürtemi longkak ait



Dimapur, Yimpoksüi/ November 28 (TYO): Aotsür telongjem, Shillong-i ayonzüka November 27 nü 10 ako nungi tenzüka Shillong nung Nagaland House kima longka aitba sentong ka ayonzüka agia liasü.

"The Patriotic Nagas" ta nungja agütsür facebook telok ka ajanga Aotsürtem aser Padma Bushan, Dr. S C Jamir tenüing menüksüba anema Sillong nung aliba Aotsürtemi longkak aita liasü.

Sobaliba sobutsü aser iba mezüingmeshi inyakyim aitsüba temaitsü arm band tanak semer Aotsür 40-i iba longkak aitba sentong nung shilem agia liasü.

Iba sentong ya Watsü mungdang, Mokokchung tawabangba kübok ayonzüka agia liasü.

Sentong tatsüka agiba mapang Aotsürtem tenüing menüksüba anema ola adoka liasü. Parnokisa, lokti lenirtem aser lokti tentet balalai jenzang

tapet agitsü aser iba amala inyakyim ya yimjak nung aitsütsü kodang tongtibang iba indang lemsatepba den aibelena alirtem anema temzüing ozüing dak ajemdaker jenzang tapet agitsü ayonzüka liasü.

Shillong nung aliba Aotsürtem Watsü mungdang den noktaka aliba nenshia metetdaksüba den ken o dak sendaka aliba ketdangsürtemi jenzang tapet agitsü imla ataba parnokisa lemsatepogo.


Hornbill mapang drone amshitsü temelaba meshitsü nungdaker

Dimapur, Yimpoksüi/ November 28 (TYO): Hornbill benjung mapang Kisama nung drone amshitsü bilema aliba kija aser department ajak dang

Police Headquarter, Kohima, Nagaland nungi temelaba meshitsü metetdaksüogo.

Temelaba memeshi-i drone amshira temzüing ozüing dak

ajemdaker merenshitsü, ta Superintendent of Police, Kohima office sangdong ka ajanga November 27 nü metetdaksüogo.



**Government of Nagaland
TRANSPORT DEPARTMENT**

NO.TPT/NST/HBF/14/ Dated, Kohima the 27th November, 2024

BUS SHUTTLE SERVICE FOR HORNBILL FESTIVAL 2024

This is to inform the public that Transport Department will be providing City Bus Shuttle Service from Kohima to Kisama Heritage Village from 1st - 10th December 2024 in the following 3 (Three) locations:


SN	Location	Ticket Per Head
1	ISBT Kohima to Kisama	₹80/-
2	NST Station Kohima to Kisama	₹70/-
3	PR Hill Junction, Kohima to Kisama	₹50/-

The daily service will be available starting at 08:00 am from the above 3 (three) locations at Kohima. Return bus service also will be available from Kisama to Kohima from 10:00 am onwards. The last shuttle bus service from Kisama Heritage village to Kohima will depart at 09:00 pm on daily basis.

Further, daily free bus shuttle service will be provided from Kigwema Public Ground (Parking area) to the venue (Kisama) and from Kisama (Venue) to Kigwema Public Ground (Parking area).

General public including tourist visiting Kisama may avail the bus services as provided by the Government.

Sd/-
Robert Longchari
Secretary to the
Government of Nagaland



Nagaland nung Lighthouse School Project ulushir

Dimapur, November 28, 2024 (TYO): November 27, 2024 nü Kohima District Committee for Lighthouse Schools (DCLS) senden ka menogo.

Deputy Commissioner, Kumar Ramnikant menden ser amenba senden nung NECTAR kübok World Bank-funded Lighthouse School Project inyaka aruba meyipa reprangshia liasü.

NECTAR teloki mapatong indang osang tejangja bener arua lemsatep. Yimtsüingtem nung model residential schools lapoktsü, yimtsüing nungi jila bushia tazüing aoba noktangtsü aser educational standards

tajungba kümdaktsütsü alizüingtem parnokisa metetdaksü.

Senden nung NECTAR teloki hub-and-spoke school design, community involvement, school selection criteria, aser environmental & social standards sülen anidaktsüba presentation sayua liasü.

NECTAR mapatong ya April 2021 nung tenzüka aser mezüingbo district 11 nung dang inyak saka tangbo district 16 nung inyaker. Parnoki June 2026 tashi nung renemtsüsa mapa inyaker.

Iba senden nung public lenirtem, district ketdangsürtem aser educational standards aser sendaktepa alirtem aden.

Nagaland nungi Film yanlur 10 IFFI nung aden



Dimapur, Yimpoksüi/ November 28 (TYO): 55buba International Film Festival of India (IFFI) nung Nagaland nungi film yanlur parnok 10-i oa shilem agiogo. Iba sentong nung shilem agitsü atema Department of Information and Public Relations, Nagaland-i shima liasü.

Sentong nung shilem agirtem rongnung Vilen Tase, Athe Rhi, Nungshitemjen Jamir, Vikepe Yhokha, Lonehol Kin, Ravinder Chetri, I Baso Chang, Arienba Jamir, Jepito H Zhimomi aser Tiakumzuk Pongener nung densema liasü. Iba Festival ya Goa yimtiba Panaji nung November 20 nungi 28 tashi anogo 9 agia liasü.

International Film Festival of India (IFFI) mapang November 23 nü Secretary of Ministry of Information and Broadcasting, Sanjay Jaju den session ka Kala Academy, Panjim, Goa nung agia liasü. Iba session nung kaketshir delegate aser lanur film yanlur parnok 274-i shilem agia liasü.

Benjung Omen; 'Creative Minds of Tomorrow,' dak ajemdaker jembiba mapang Jaju-i, lanur film yanlurtem dak sempet aliba indang lemsatep aser ashiba agi, asenoki tesüiba mapangtem nung angazüker aser yamaji tangazükbatem lanurtem nem belenzüka agütsütsüla.

Paisa, kaketshirtem dang pei

sempet aser craft arantetshitsü aser parnok mapatem sabang tuluba nung sayutsü atema nükjidong ayutsü ajungshia liasü.

Maneni pai, metongjemi alirtem tonga aotsü kodang tongtibang iba indang lemsatep den, northeast dak rangloker inyaktsü atema ministry-i benoka aliba tenüingsanga liasü.

November 27 nü IFFI 2024 Gala Premieres nung sayuba film tem rongnung "Headhunting to Beatboxing" densema liasü, koba ajanga Nagaland indang sonic heritage sobaliba sayuogo. Iba musical documentary, "Headhunting to Beatboxing" ya Rohit Gupta-i direct asü aser AR Rahma-i produce süa liasü.

South Asia nung International Federation of Film Producers' Associations (FIAPF)-i IFFI kija accredited süir lir. IFFI ya 1952 küm film yanlur, cineastes, aser industry professionals tem nem sabang tajung ka agütsütsü atema amenoka liasü. 2004 küm nungi IFFI ya National Film Development Corporation (NFDC), Ministry of Information & Broadcasting, Government of India and Entertainment Society of Goa (ESG), Government of Goa nung longjemer Goa nung ayonzüka agia arudar. Taküm iba benjung ya 'Young Filmmakers - The Future is No' omen nung ajemdaker agiogo.



November 28, 2024 nü New Delhi nung Himachal Pradesh Angh, Shiv Pratap Shukla-i Ato kilonser, Narendra Modi ajurudang tangokba noksa nung angur.

MEA-i Bangladesh nung Hindu nunger kümzüksü mepishi

New Delhi, Yimpoksüi/ November 28 (Agencies): Brihostibarnü Ministry of External Affairs (MEA)-i Bangladesh nung Hindu nunger tekülem ki aika amakba atema tebilemsü akaba lemsatepba den külemi Bangladesh sorkar dang Hindu nungertem densema linük nung nütsüng ajema aliba nüburttem kümzüksü atema tangsa inyakdaksüner, ta mepishiogo. Rajya Sabha nung tasüngdangba ka langzüdang Minister of state for external affairs, Kirti Vardhan Singh-i, "Tesüiba ita ishika Bangladesh nung Hindu nunger tekülem kitem aser tsüngremtem raksatsüba osangtem aika lir. Taküm Durja Puja benjung mapang nung Dhaka kübok Tantibazar nung Puja Mandap amakba aser Satkhira nung Jeshoreshwari Kali tekülem kidang auyaba densema

tekülem kitem aika raksatsüba tatalokbatem atema India sorkari tebilemsü akaba lemsatepogo," ta metetdaksü. Minister-isa, India sorkari Bangladesh dang senso ajak, talisa minorities takümttem kümzüksü aser temeden balala kümzüksü atema inyakang ta shiogo, ta metetdaksü. "Sorkarisa Bangladesh sorkar dang Hindu nungertem aser minorities kümzüksü aser parnok indang tekülem kitem kümzüksü atema inyakang ta shiogo. Bangladesh nung minorities densema senso ajak taküm kümzüksü aser temedentem kümzüksüji Bangladesh sorkar teinyaksü mapa lir," ta minister-i metetdaksü. Bangladesh nung taoba mapang Ato kilonser, Sheikh Hasina-i menden nungi anenba sülen linük nung mepetmesü tulu adoka yimtenren tashi meiti lir.

Bangladesh yimtiba, Dhaka nung aliba Durga Puja Mandap nung bomb ka onlokja liasü. Iba bombji ajanga shinga meyiru ajisüaka benjung mapang Hindu nunger tekülemertem melungjang nung tetsübu aita daksüogo. 2021 küm March ita nung Ato kilonser Narendra Modi-i Bangladesh semdangba mapang nung pai Kali tsüngrem korang ka sempet agüja liasü, ajisüaka taküm October ita nung Satkhira nung aliba Jeshoreshwari Kali tekülem kidang nungi iba korangji auyago. Iba ama tensa ka nung Hindu ISKCON putir, Chinmoy Krishna Das Dhaka airport nung apuba sülen nungi Hindu nungertem atema tensa ano tamajungba kümogo. Krishna Das-i October ita nung Bangladesh nunger wako mezüngmeshiogo, ta pa nem tai tonglokja liasü.

Delhi nung tensa majungba atema Kejriwal-i Centre aitsür

New Delhi, November 28 (Agencies): Delhi nung tzüzüng-ozüng tensa majungba atema AAP tongti lenir, Arvind Kejriwal-i BJP-i aniba Centre sorkar aitsüogo. Brihostibarnü party office nung osangbenertem den jembidang Kejriwal-i, "Delhi tesem ajaklen tetsübu tensa ka lir. Tetsürtemi aonung 7:00 ako sülenbo kimai ayazüka aotsü tsübur aser tsüraburtemi pei jalatem kimai aotsü atema shisabulutsür," ta ashi. Paisa, Union Home Minister

Amit Shah-i repranga lia yimti nung rakzükkraktemba, khatepba aser ozüng alema inyakba mapatem kanga bulua ataloker, ta ashi. "BJP aser Home Ministry-i Delhi ya rakzükkraktemba aser raraba tiyongtsü tesem ka kümdaksüogo," ta Arvind Kejriwal-isa metetdaksü. Paisa, pa Delhi Chief Minister inyakba mapang nung AAP-i shisaliok, health aser electricity tsütsü mapa tajung aika inyakba metetdaksü. BJP-i tim masüba nung

ozüng benokba agency amshir, ta pai aitsü. Delhi Police ya Union Home Ministry kübok lir, ajisüaka parnoki parnok teinyaksü mapatem meinyakteter, ta paisa aitsü. Kasa senden nungji AAP lenirtem- Manish Sisodia, Sanjay Singh aser Saurabh Bharadwaj nungera densema liasü. Sangküm February ita nung Delhi nung assembly elections agitsü lia AAP aser BJP na tsüngda sashia aitsütep tenzükogo.



November 28, 2024 nü New Delhi nung osangbenertem senden ka nung AAP National Convener Arvind Kejriwal aser party lenir Manish Sisodia nati Union Home Ministry kübok Delhi nung ozüng alema inyakba mapatem kanga bulua atalokba indang kaket ka sayudang tangokba noksa nung angur.

Waqf bill ya secular anema lir: Mamata Banerjee

New Delhi, Yimpoksüi/ November 28 (Agencies): Brihostibarnü West Bengal Chief Minister, Mamata Banerjee-i, Waqf (amendment) Bill ya secular anema lir, aser iba ozüng ya ajanga Muslim nungertem temeden rakzüksü, ta aitsü. Mamata Banerjee-isa, iba bill ya state sorkartem den jelia mejembitepa benok, ta ashi. West Bengal assembly senden nung jembidang lai, "Waqf bill atema onok (state sorkartem) den o melemtep. Iba ya ajanga waqf kiojentem raksatsütsü. Yimsü ka anema kechiba parnoki iba ama bill benoker?. Iba ya federal anemba bill ka lir. Iba ozüng ya ajanga Muslim nungertem temeren rakzüksü," ta ashi. Waqf bill atema tentetba Joint Parliamentary panel ya Budget session, 2025 tashi atsülangogo. Bodhbarnü Parliament senden nung Waqf bill atema o lemtepa mapang nung opposition züngsemtemi longkak aita kimai lua liasü. Opposition party temi Waqf Act nung yanglushiba ozüngtem

anema nokdaker. Itemji Muslim nunger temeden anema lir ta parnoki ashir. Ajisüaka ruling BJP-ibo, iba bill nung ozüng tasen kar benokba ajanga waqf boards inyakasangshi teladak akümtsü, ta ashir. JPC chairman aser Bharatiya Janata Party (BJP) MP, Jagdambika Pal-i Lok Sabha nung report agütsütsü atema ano mapang atsülangshitsü benoka liasü, ajioda house-i agizük. Asükwa mongpu Parliament November 25 nü tenzük saka anogo asemnü tashi House anaprongla nung Waqf bill onük nung mangatettep adokba ajanga senden junga magiteti arudar. Opposition züngsemtemisa Sambhal nung rara, Manipur tensa aser Adani Group-i sübokremagütsü ta tai tonglokja aliba onüktem nung o lemteptsü akhanger. Ato kilonser Narendra Modi-i aniba Centre sorkari tan mongpu Parliament nung Waqf Act Amendment Bill densema bill 16 benoka agizüksü tebilemba lir.

Priyanka-i Kerala tsürtem indang saree agir MP tenangzükba agi



New Delhi, November 28, 2024: Brihostibarnü asükwa mongpu Parliament senden nung Congress party lenir, Priyanka Gandhi Vadra-i MP tenangzükba agidang tangokba noksa nung angur.

New Delhi, November 28 (Agencies): Brihostibarnü Congress party lenir, Priyanka Gandhi Vadra-i Lok Sabha nung MP tenangzükba agiogo. Lai linük temzüng kaket ka amer tenangzükba agi. Iba sentong nungji Lok Sabha Speaker Om Birla den MP tem aika liasü. Priyanka Gandhi-i Kerala kübok Wayanad by election nung takok angu. Brihostibarnü lai Kerala tsürtem sobaliba saree ka agir tenangzükba agi. Priyanka Gandhi-i Wayanad Lok Sabha menden nung vote tali 4,10,931 agi Communist Party of India (CPI) lenir, Sathyan Mokeri madak takok ngua liasü. Iba menden atema by election nung Priyanka Gandhi, BJP nungi Navya Haridas aser CPI nungi Sathyan Mokeri nunger tsüngda toktepa liasü.

Bodhbarnü certificate of election agizükba sülen lai X ajanga, "Tanü Wayanad nungi kü den külemi inyakertemi certificate of election bener arutsüogo. Ni asoshiho iba ya document ka dangbo masü; iba ya nenok temeim, nenoki tamang katetba aser külem tangatetbatem temaitsü lir. Nenok atema tarutsü tajung yangertsü asoshi ni shimba atema nenok dang pelar, Wayanad," ta lemsatep. Taküm April ita nung Lok Sabha election nung Congress lenir Rahul Gandhi-i Uttar Pradesh kübok Rai Bareilly aser Kerala kübok Wayanad menden naprongla nungi toktepa liasü. Pai menden anaprongla nung takok anguba agi menden kabo azüngtetsütsüsa aküm. Ajioda pai Wayanad menden azüngtetsütsüsa ajanga iba menden atema by election agitsüsa aküm.



TIR YIMYIM YIMOBILEM (EDITORIAL)

DIMAPUR ROGONÜ, NOVEMBER (YIMPOKSÜI) 29, 2024

Peisasa aküplokba lendong !

Manipur nung nübortem pei kidanga melitetsüsa aser talirtema ayipjanga memejangtetsüsa lendong tulu ataloker, joko, küm ana jungdi asür saka tensa süngjema akümtsüsa teimla tangsabo mangur. Atangji, tensa tia agibo 'President's Rule' agütsüsa langa lir, saka yaküm May ita tetenzüklen lendong atalokli Union Home minister, Amit Shah khen arur ' Yimjung Committee ' ka tenteta yutsür aoba dak alaka tang tashi prime minister, Narendra Modi-bo kena maru aser Amit Shah-i tenteta toktsüba 'Yimjung Committee' -a tamena kena mementet ser mapa küma moutet anenadok. Atangji, Manipur ama temeyoktep kintem alidak nübortem rongnung ain adoka tsükchiteptsüsa atalokbaji ajungbena atalokba mapa kabo masütsü. Ashiko, parnok rongnung kati ka maginütsüsa inyakba mapatem agi mapang talangka mepelatepi arur alitsü südi, iba jagi lendong ataloktsüsa tenzükba onükjibo Manipur nung Meitei nungertem nem 'Scheduled Tribe' jenjang magütsütsüla ta Manipur nung alir Naga nungertem o Kuki nungertem nati ola adoka apuso ser nung, Scheduled Tribe onükjibo toktsür Imphal nung Kuki nungertemang melitetsüsa akümbaji tangaribo mangatetsü. Aji oda, tangbo Imphal nung Scheduled Tribe agütsütsüla mesüra magütsütsüla ta asüba tebilemtsü onük masü saka Manipur nung Meitei nungertem lokti tentetem ajak lokteper akümba telungjem, Co-Ordination Committee on Manipur Integrity (COCOMI) teloki Imphal lenden nung state aser central government office kata melapokdaksüi longkak aittsüsa akümba tensa tia ya peisasa lendong timtem aküplokba mapa ka lir. Aji oda, yaküm May ita nungi tenzükba Imphal nung Meitei nungertem inyakba mapatem ya reprangdangra, parnoki ST jenjang aginür asü mesüra Kuki nungertem maginer (?) mesüra Khristan yimsüang maginür ta bilemdangtsüsa tatalokba aika ataloka arudagi. Atangji, Manipur nung alir Meitei nungertem ST jenjang aginüa center government dang akangba atemaji kecha tai mali, kechiyong koba kinibo India nung ST jenjang maginütsü ? Ajisüaka, ST jenjang agütsütsü magütsütsüsbaji center government dak dang keta lir aser aji meshiba agi agütsütsü masü saka reprangdang par kin sobaliba, temetetba aser rongsen jenjang agi tangar menepa aliba – maliba agi ashitsü. Iba tetenzükba onükji yutsür, Imphal lenden nung nisungtem telidak kiojentem dang masü saka tenla ki dena rongdokja raksatsüsbaji India nungsa süaka Northeast nungbo meimlaba mapa ka atalokogo. Aji oda, tenla ki raksatsüba dang masü saka tenla kidang Khristan yimsü atalaja inyakba mapatemji temulung ashitsüka aser iba ama tamangba yimsü anema inyakerkemji temeimtsüka, kechiyong ibaji Khristan-tem anema inyaker masü saka parnok taküm madak kibur aser taküm Tsüngrem anema inyaker. Itemji tajung tazü agi matemtsü. Item ama, nisung masü, Tsüngrem anema inyakerkem rongnungji peisasa ateploka rongrongtsüsa aser mangmangteptsüsa ataloktsü. Aji oda, tangbo Imphal lenden nung alirtemji tangar anema masü saka pei yimten yimsüsürtem meyong kiojen dena raksaja anema apusoba angur. Tanü Imphal lenden nung alirtem asoshi tebilemtsüji tangar den masü saka pei nisung rongnung kati ka aitsüteptsüsa akümba tensa tia ya tapi agibo masü. Aji oda, tangbo parnok asoshi ST jenjang meshitsüba masü saka tang aliba Manipur state tawazük ya merasaki wazüka ayutsüsbajiang rongdak nungdak tongtimbang onük ka kümogo. Atangji, alinüka sang mesüra nübortema sang, tapu balala agi ka küma longjemmer putepa alitsüba yabo tashiyim agi makoktsü. Aji oda, pei lima meraksai akhi ama tesünep aser yimjung nung putepa alitsü asoshiho khen süngjemshir bilemdangtsüla aser Tsüngrem aser nisung jashitsüsa inyaka lira itemji shitak küma metongshitsüla. Imphal nung alirtem asoshi dang masü saka Center government asoshi tanü Manipur nung atalokba tebilemtsü ya peisasa yangluba tebilemtsü agi tatar senden nunga dena meinprongtsüsa atalokba tesasatsü mapa ka lir.

OLEMSABANG

NLTP ACT: KECHI NUNG TAMAKOK?

~ Rev. Dr. N. Lipok Jamir, Pastor,
Ao Baptist Church, Diphupar

(Yashi adok nungi...)

Tasembuba nung, "Arogoi yi dak sentakba nung mapa kecha meinyaker saka NLTPA magientsübabo Government kanga nungshir" Hau Arogoi temulung süa inyakogo ta mashir, tamakok tulu lir ta agizüker; saka ABAM-i anir Arogotemi küm jenti achi-ajemertem anebaluba nung rongsen nübu aser mapang jenti indoka arudagi. Yongji tanübo Arogotem nung yi ajemertem aser mim mozü achirtem aika taküm melenshir arogo nung luden balala nung tenzükdagi. ABAM SOC bangzüng rongnung kabo Social Concern Ministry tenzüktsü renemogo.

Pezübuba nung, "NLTPA ajanga yi tamajung ajemer aser iba jagi yakta temang raksatsür; NLTPA agienra yi tamajungji pa agi sama aotsü" Hau, akhi mapang dang nungi tanü anguba yiji tamajungba asütsü südi, kechiaser tanga chiyungtsüa ajak nung mim mozü keter dang angur. **Tatishitsü agi** Ango nung temang meraksadaksütsü asoshi tasü mang nung amshiba formalin enoker angur, aji dang masü ango taküm yaa mim mozü agi mesüba ang angur, aonsotsüa koda? Act ya agien nungbo yi tajung angutsü ta bilemya alitsü südi, saka yi tamajungji talangbasa angutsüji tamajungbasa asütsü.

Pungububa nung, "NLTPA ya agienba ajanga sen aika meyipa angutsü" Kechiba yi ajanga sen angutsü indang dang jembir? Kechiba Nagaland nung ariena industry ka ana lapokba anenba indangbo mejembir? Nüburtem tongtimbang lanur zünger mapa mangurtem ajangzüktsü industries, factories tasen lapoktsü indang mejembir, saka yi koba agi taküm, kibong aser lokti ajak asoshi teraksa jenti adokdaksür, iba nungi sen ajangzüktsü indang kisung jembir?

Tanü Government ochimashi jateta adokba yabo koda, Centre nungi scheme balala asoshi sen kwi arur? Lenmang ya danga koda: 2013 **Vajpayee** PM mapang four-lane approved asü. 2021 nung lapoktsü renem. Tang kechi tia nung lir. Iba ocet renemba mapang ochimashi indang jembiba aser osang kaket nung adokba ana shidi: Tawa NL nung MLA kati Social Welfare Deptt. nung Rs. 11,18,00000 nungi Rs. 29,500 dang workers nem agütsüba anema kuli meshiogo. Iba den Nagaland Transparency, Public Rights Advocacy & Direct Action Organization (NTPRADO)-i PHED nung Jal Jeevan Mission (JJM) scheme nung 1712.03 crores ochi meshii amshiba anema kuli meshiba (NI Post 20 Oct. 24) nung nguogo. Süra yi nungi aruba sen agibo development, tajangzük jenti bener arutsütsü ta guarantee sütettsü asü? Naga nungertem otsü nung yi agi shishilembaba otsübo mali; alu nungi adokba aonsotsü, aser teka agi yangluba osettem dang shishitepa aru, yibo tembar tsüngda, kinunger adianu tsüngda dang lemsatepa aru, aji mamali.

Trokbuba nung, "shimtsüji Tsüngremi agütsüba temeten, anungji tejemnürtem jemdakjang" Nisung ka yi lar (alcoholic) aküm nung lokti nem timtem agütsübabo doktsür kinunger 40 tashi nem timtem agütsür (ya mongintemi agütsüba). Anungji, yi yabo kija dang masü lokti temenen aser lokti tebilemtsü (social sin and social problem). Anungji iba lokti temenen anemaji raraba tongpang ka ibai lir. Tasadangba aka ajanga ashiba agi tang ya Naga lima nung kibong 4 nung ka agibo yi ajemer ta ashir.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung putir tambutisang Thomas Oleghe alima nungi pilaogo



Monsignor Thomas Oleghe

November 28, 2024: Nigeria nung putirtem rongnung tambutisang, Monsignor Thomas Oleghe alima nungi pilaogo; pa arrshi küm 104 liasü.

Diocese of Auchi nung tongti putir, Gabriel Dunia-i sangdong ka ajanga November 24 nü Thomas Oleghe asüba osang metetdaksü.

Monsignor Thomas Oleghe temeshi Amongnü anepdang züngia 2:30 ako meta süngjema tesünep nung amouzüka ao, ta sangdong nungji shia lir.

“Alima nung taküm junga litetba atema Tsüngrem nem tenüngsang agütsür. Tanü Nigeria nung Catholic putirtem rongnung tambutisang, Rt Rev.

MSGR Thomas Oleghe alima nungi pilar tüküm külen ajanga aoba ni sangdonger,” ta Dunia-i metetdaksü.

“Pa ya Diocese of Auchi nungi liasü. Pa arrshi küm 104 nung asü. Pa tanela maneni tesünep nung anisüngzükang ta ni sarasademtsür,” ta Dunia-isa metetdaksü.

Monsignor Oleghe-i pa akümüli mapang nung Arogo atema bendanga agüja tenzükogo. Nigeria nung Catholic Church ainba nung pai tongtibang shilem aika agia lir.

Pa asüba osang prokshiba sülen aikati pa nem tetushi agütsüdar. Pa ya tesüngjem lenir ka liasü aser tamangtir ka liasü,

ta aikati lemsatep.

Taoba mapang Edo State nung Governor, Godwin Obaseki-i, “Oleghe ya tamangtir missionary ka liasü. Nigeria nung Catholic putirtem rongnung tambutisang asüba osang angashia ni jashir. Pa ya nendaka inyakba aser temim aketba putir ka liasü. Khristan tamang aintsü aser Khristantem renloktsü atema pai kanga nendaka inyakogo. Pa dang nungi aikati taishitsü agitsü aser pa taküm ajanga lanurtem aika ajungmesotsü,” ta metetdaksü.

Pa den tatembangbuba asüpila sentong November 27 nü agiogo.

December 1 nü Middle East atema sarasademtsü ayongzüker

November 28, 2024: Church of Ireland indang World aid & development programme kübok putirtemi taruba Advent Sunday (December 1) nü Middle East atema sarasademjang, ta mepishia metetdaksüogoo.

Sarasadem onüktem: Gaza, Lebanon aser Middle East tesem ajak nung jenshia alirtem kümzüka alitsü aser parnoki nüngdakba teyari balala angutsü atema sarasademjang.

Rara ajanga prokshia alirtem atema sarasademjang; talisa asükwa mongpu tongogo, anungji parnoki timtem kanga ajangshitsü; iba rara nung yirua

alirtem nem taneptsüba agüjang aser mangyimertem nem tesünep agüjang ta sarasademjang, ta Church of Ireland-i mepishia metetdaksü.

Talisa tsürabur malir mesüra anepalur maliba tanurtem atema sarasademjang.

Rara aliba tesemtem nung teyari agütsüba mapa inyaker Arogotem aser melungtet teloktem atema sarasademjang.

Iba ama rara tiyongtsü nung tenzükba mapa inyaker Diocese of Jerusalem atema sarasademjang. Middle East region nung Arogo lenirtem kümzükang ta sarasademjang, Gaza nung melungtet telok

Tearfund indang partner atema sarasademjang, kechiyong parnoki shirangertem nem tongtibang mozü balala lemja yaridar, ta Arogoi metetdaksü.

Teti atema yimjung alitsü asoshi lenirtem nem shisatsü agüjang, ta sarasademjang.

Tsüngrem taochi ajanga iba rara anentsü asoshi sarasademdi.

Advent Khristmas atongtsü anogo ishika dang lia Yimjung Chuba ajanga Middle East aser alima tesem balala nung rara aliba tesem ajak nung yimjung bener arutsütsü asoshi asenoki sarasademdi, ta Arogoisa ayongzük.

ISIS kiralongrartemi Mozambique linük nung Khristan 4 tepset

November 28, 2024: Mozambique nung Islamic kiralongrartemi Khristan pezü tepset; parnok rongnung anabo terok-zü rangdangja liasü.

Tan ita tetenzüklen Islamic State Mozambique (ISM) kiralongrartemi Cabo Delgado province amakba mapang nung Khristantem tepset, ta Khristan charity telok Barnabas Aid-i metetdaksü.

November 3 nü Muidumbe District nung kiralongrartemi Khristan ana puer aoba sülen tepset, November 7 nü Machine gun amshia amakdang Khristan

ka khaset aser November 9 nüa Khristan ka tepset, ta Barnabas Aid-i metetdaksü.

ISM ya ISIS network den tesendaktep lir. 2017 küm nungi tenzükba parnoki Islamic yimli amenoktsü nükjidong nung Cabo Delgado nung timtem agüja arur.

ISM telok yagi yimtsüngtem rongdoktsür, Tenla kitem raksatsür, pastor tem puer aoer aser Khristantem densema civilian aika tepsetogo.

Parnoki mapang shia timtem agütsüba ajanga nisung 800,000 dak tali tesem balala nung

jenshiogo; talisa Muslim nütsüng teimba aliba northern region nung Khristantemi timtem aika ajangshir, ta Barnabas Aid teloki metetdaksü. Rwanda densema linük balala nungi sepaitemia kiralongrartem anema rarayonga ISM-i maneni timtem agütsüba ajanga aika kanga sensak tia nung lir.

Sorkar aser Jihad kiralongrartem tsüngda raradang Khristantem tiyongtsü nung kanga timtemer, ta Khristan melungtet telok Open Doors-i metetdaksü.

ANOGO ABEN TSÜNGREM DEN

Taküm Tsüngkümtem

Sayutsünger 3:1

Tsüngremi tsüngküm pezü yangluba tebur tajungji, parnok balaka süaka, taküm bener arutsü aser indaktsütsü asoshi külemi mapa inyaker. Metsü tsüngküm temerük aser taküm tasen meyiwa ainba aser süngjang adokba. Mangkonang aluruba aser inyakerkem taa anguba. Tsüngküm tesepi aiba aser shibangba. Tsüngküm shia temeja tebur tajung aser taküm nung tetezü akaba teyari agütsür.

Yimya nung Tsüngremi tsüngkümtem sentong ayuba ama, Pai taküm nunga sentong ayur. Taküm nung Metsü mapang, asenoki mapa tasen tenzükker aser tarutsü yongyaseta repranger. Meyi mapang arur, asenoki tatsük kümdanga Tsüngremi nüngloktsüba ajak inyaker. Mangkonang mapang asenoki inyaka aliba nungi süngjang angur. Tsüngküm nung asenok taküm mapang tatembangleni arur. Ken ken tsüngkümü timtem bener arur saka asen meketa metsü mapang ali nung asenoki teimla kaa atar.

Asenok taküm asoshi Tsüngremer sentong, Pai süngjang atangba mapang aser mapa inyakba mapang yanglu. Pai ajemajema alitsü aser anisüngzük mapanga yanglu. Pai ajemajema anogo shia mapaji maneni inyaka alitsü ashitsü mapang arutsü saka idakji ajungmesoba aser tasen tenzükba alitsü. Tsüngrem taochi ajanga asenoki tamang katetba süngjang anguba mapang alitsü. Tsüngrem taochi ajanga asenoki tejashi aser shisabulu tsüngküm koktettsü kechiaser tsüngküm meli-i idakji metsü mapang malitsü. Yimya nung item tsüngkümtem ama, taküm tsüngküm Tsüngremer nükjidong bener arutsü asoshi tsüngkümtem külemi inyaker.

Haiti nung Khristan putirtemi yimjung atema inyaktsü ayongzüker

November 28, 2024: Haiti nung putirtemi nung tesüba ita aika raraba sülen ano maneni tang tensa tamajungba akümba mapang nung Haiti nung Khristan putirtemi ketdangsertem dang yimjung atema inyaktsü ayongzüker.

Ozüng alema tentetba telok balalai Haiti yimtiba, Port-au-Prince ano taliba amokbangogo.

Port-au-Prince nung Archbishop aser Haitian Bishops' Conference Tir, Max Leroys Mésidor-i Aid to the Church in Need (ACN) dang, November ita tetenzüklen nungi ano tensa kanga tamajungba kümogo, ta metetdaksü.

Tesüba hopta ishika tsüngda nisung meyrjang aika pei kidang nungi jenshiogo aser supply chains raksaogo.

International Organization for Migration (IOM)-i ashiba agi, Haiti nung tesem balala nung jenshiba nisung 700,000 nungi tesadangbo tanurtem lir, ta metetdaksü.

Linük nung putirtemi yimsüsüba menden nung alirtem dang linük nung yimjung alitsü atema inyakang, ta mepishir.

“Ajak kümküma lir. Onok ajak amokmeren tia nung lir,” ta Archbishop Mésidor-i ashi.

Haitian Bishops' Conference-i sangdong ka ajanga, “Toussaint Louverture Airport shibangadokogo, aser ibaji ajanga onok alima den tesendaktep ajak raksaogo. Rara prokba ajanga yimjung angutsü meimlatsüla. Yimjungji ajak dang nungi temaba aser iba ya Tsüngrem nungi sempet lir, ajisüaka yimjung atema nübur ajaki inyaktsüla,” ta metetdaksü.

“Onoki sorkar ketdangsertem, lokti tentet balala nungi lenirtem aser raraba hadir aliba telok balala ajak dang iba rara anentsü atema inyaktsü mapang tongogo ta angatetdaksüner. Langkabosa inyaktsüla,” ta Haitian Bishops' Conference-i metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tasoba

(adj) tetsüpok nungi alimai aruba (birth)

* Mahatma Gandhi tasoba anogo Mongputeni 2 nü amonger.

Tasong

(adj) tsünüsembongtsü mesüra süngdonglidong kanga tsüngtepa meyiba (Saplins so crowded together)

* Süngdonglidong tasong alidak junga mainer.

OLONG PAITEP # 6996

15x15 crossword grid with numbers 1-15 indicating starting positions.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _____ kibur - (5)
13. Tebur tembar tsüngda jatepba - (4)

OLONG PAITEP # 6995 TELANGZÜBA

TIPIEN :

- 1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER MA



Barcelona winger Lamine Yamal nem 2024 Golden Boy award agütsüogo. 2024 küm Spain-i Euro akokba mapang teyari tulu agütsüba sülen pai arishi küm 17 aser ita pezübuba nung iba naroküm agizüka pa iba naroküm agizükba asayartem rongnung tanobusang kümogo. Iba tetushi ya Europe nung arishi küm 21 tekübok asayartem nem agütsür aser taküm Yamal-i, Real Madrid nungi asayar Arda Guler aser Paris St Germain nungi asayar Warren Zaire-Emery na ajateta iba naroküm agizükogo.

Assam Cabinet-i 2025 nung public holidays 36 agizüker

Guwahati, November 28, 2024 (Agencies): Assam Cabinet state sorkar sodi anogotem teimtiba kümogo aser iba ya cultural o regional festivals 36 lir.

"2025 küm atem state sorkar mapa inyakterem atema sodi 36 mulunga agizükogo aser iba dak alia restricted holidays talila 7 lir" ta Assam Education Minister Ranaj Pegu-i ashi.

Sorkari mulunga agizükba benjungtem rongnung Nuakhai festival, Bir Raghav Moran Divas, Wangala Festival, Matak Raja Swargadeo Sarbananda Singha Divas, Gurudev Kalicharan Brahma birth anniversary, Sati

Radhika Utsav aser Rongker Puja dena lir.

Tang nungi Assam kübok district 11 nung Ali-Aye-Ligang festival atema restricted holiday ya public holiday ka ama amongtsü.

Assam Cabinet-isa Agriculture Marketing Board nung mapa inyakterem atema Voluntary Retirement Scheme (VRS) mulunga agizükogo.

State cabinet-isa Hojai district headquarters (Sadar) Sankardeva Nagar nungi Srimanta Shankardeva Nagar ta melentsü lemtetogo.

Taoba hopta Chief Minister Himanta Biswa Sarma-i State

cabinet Karimganj district dang Shreebhumi ta ajatsü lemtetba osang metetdakja liasü.

Guwahati nung Janata Bhawan (Assam Secretariat) nung cabinet senden ka nung jungjunga olemtepa sülen cabinet tenüng melenshitsü lemtet ta CM Sarma-i ashi.

Sorkarisa Assam nung putiotsü den tesentaktep maliba tesem aser district nünja kar melenshitsü ta paisa ashi.

Assam nung tesem aika putiotsü nung aliba ama masü tenüng agüja lir anungji BJP sorkari nungjattem melenshitsü, ta CM Sarma-isa ashi.

Mizoram sorkar mapa shitak meinyakterem anentsütsü

Aizawl, November 28, 2024 (Agencies): Mizoram sorkari non-performing employees aser mapa inyaksü metemsüpurtem anentsütsü lemtetogo ta Chief Minister Lalduhoma-i ashi.

Aizawl nung education department maparen meyipa reprangshiba senden ka nung "state sorkar kübok departments nung inyakteremi mapa inyakba meyipa reprangshitsü atema luden balala tentetogo" ta CM Lalduhoma-i ashi.

"Mapa inyaksü metemsüba nisungtem anentsütsü. Mapa inyakterem dang sorkar mapa inyakdaksütsü" ta pai ashi.

Sorkarisa mapatong ajak timi aser jungjunga inyaksü atema meratem agidar ta Mizoram CM-isa ashi.

"State project monitoring committee-i mapatongtem reprangdar aser tang tashi nung parnoki mapatong 40 tashi reprangogo. Mizoram nung mapatong inyakba ajak onoki

akangkanga tenük yoktsü" ta Lalduhoma-isa ashi.

State sorkari Corporate Social Responsibility (CSR) tip atemtsü meranger, tesüiba nungbo CSR ya department temi dang parnok sasa inyaka aru ta paisa metetdaksü.

Mizoram sorkari Chief Minister's Office (CMO) nungi CSR centralize asütsü lemtetogo aser department ajaki CSR cell ka ajanga CSR meshitsü ta CM Lalduhoma-isa ashi.

Government of Nagaland OFFICE OF THE SUPERINTENDENT OF POLICE Kohima : Nagaland. TRAFFIC ADVISORY FOR KISAMA HERITAGE VILLAGE FOR THE 25th HORNBILL FESTIVAL 2024. To ensure smooth vehicular traffic at Kisama Heritage Village for the 25th Hornbill Festival 2024, the following traffic advisory is hereby issued for compliance by all concerned. 1. No heavy vehicles shall be allowed to enter Kohima jurisdiction from 07:00 AM to 10:00 PM from 1st to 10th December 2024. All heavy vehicles shall be stopped at the two locations - Peducha and Khuzama inter-state check gate. 2. Only vehicles with valid car passes issued by PHQ shall be allowed entry to Kisama heritage village from the National Highway (Gate No.1). 3. Exit for vehicles parked at/ near Gate No.2 from Kisama Heritage village shall be; i. Via Imagiland for Southern/Manipur bound vehicles. ii. Via Rhododendron resort - NH for Kohima bound vehicles for vehicles with car passes. iii. Vehicles of Event Managers / Vendors parked at Amphi-theatre Heritage shall be allowed movement through Gate -2 before 09:00 AM and after 04:00 PM. However, during this time period, their vehicles will exit through Via Rhododendron resort - NH for Kohima. 4. Vehicles with car passes shall be parked at the Parking Area Kisama (opposite Gate No. 2). 5. All vehicles without car pass shall park their vehicles at Kigwema public ground. 6. Free shuttle bus service will be provided from the parking area (Kigwema public ground) to the venue (Kisama) and also from Kisama venue to Kigwema public ground (Parking area). 7. Alternate route for vehicles coming from Dimapur/ Chumoukedima to the Hornbill Festival Kisama will be via Old KMC check gate - Jotsoma - Nagaland College of Music and Fine Arts - Forest colony - BSNL exchange - Cathedral - Aradura Inn - Phesama - Kisama. Passenger vehicles are advised to take this route to avoid traffic congestions. Direction boards at appropriate locations will be installed to guide travellers. 8. Vehicle owners are advised to keep their contact numbers pasted on the windshield of their vehicles during parking at Kigwema Public Ground and other places. 9. Vehicles parked on the NH within ROW between Phesama check gate and venue (Kisama) shall be towed without further warning as per the provision of section 127 MV Act. Vehicle owners shall be responsible for all towing costs and shall also be penalized u/s 201 MV Act (Rs 500). 10. Alightment point is scheduled around 350 mtrs from Gate-1 Kisama towards Kigwema village. ANTA vehicles/ private vehicles may drop the passenger at this point and passengers may proceed to Kisama venue by foot. 11. Pick-up point for ANTA vehicles/taxis will be at Kigwema public ground where travellers can board ANTA vehicles for their destination to town. 12. Any individual/department intending to operate drone during the festival at the venue are advised to obtain prior permission from the Police Headquarters. Offenders will be prosecuted as per law. Kohima Police request visitors to the festival for carpooling wherever possible and seek cooperation of everyone. PRO, Kohima Police

MULUNGEN O



ASO : 31.12.1958

ASÜ : 20.11.2024

Asür Merenjamba Imsong, Tatar (Ungma)

Onoki teti dang meima aliba tsürabur asür Merenjamba Imsong, Tatar, pa shirangba mapang nungi tasüba mapang tashi kija, kibong aser lokti balala shirnokisa nübu, rongsen aser tamang sarasadem agi ozü den yaritepa aruogo, nenok ajak dangi tsüngdong arua pelaba melemsatepteter, saka asen Tematiba Tsüngremi nenok ajak moajang ta ozü tamang sarasadem den pelaba lemsateper.

Temeim Kinüngtsü, Chirmur aser Kinüngertem.

Pelaba Lemsateper



Onok asür Imtisüshi Jamir'er kinungertemi onok mangyimjashi nung aliba mapang shirnokisa onok nongita yariogo nenok ajak dang kanga pelaba lemasteper.

Onoki teti meima aliba obala aser oboula arishi küm 97 tashi arishia lir November 18 nü iba lima nungi pila aoba mapang kija aser lokti tentet balalai onok dang temeim sayuba den onok nongita yariba aser onok atema sarasademtsüba atema kanga pelar.

Nenok ajak tenüng teta tepelaba melemsatepteter atema sasa bilemer saka nenok temeim, senotsü teyari aser tsüngdong arua asükhü lemsatepa ya onoki kodanga mamatoktsü ta metetdang. Tulusang Tsüngremi nenok mapa tajung asoshi molamoshia moajang ta ozü sarasadem.

OFFICE OF THE AO SENDEN "Nübur Asashi" (For the People)

Date : 28.11.2024

SANGDONGER

Asen Ao kaket keno renlokdaktsüba tsütsü aser zülumen ajaki liromedema amshiba ajanga Ao oshi tajungtiba nung wazüka ayutsü asoshi tamalen nungi sangdonga aruba den maneni ano Ao Senden Sanen Luden Mongputeni (Oct) 24, 2024 anogo iba asoshi lemtet agiba dak ajemdaker Ao senso ajaki meteta alitsü aser inyaksü asoshi nenshia iba sangdong Ao Senden mendenti ajanga sangdonger.

- i) Metsüremi (March) 5, 2004 küm lemteta akaba ama "Ao Riju majangi kija/lokti shingaa Ao oshi nung kakat madoktsü".
ii) Tsüklai (Feb) 17, 2012 Ao Senden Yimkong Mungdang nung lemteta akaba ama "Mokokchung District kübok kaketshir Aor aser Aotsür ajaki Ao subject agitsü nenshia metetdaksür".
iii) Rongjui (Sept) 24, 2019 Ao Senden Federal Council nung nenshia lemteta akaba ama Aor kija aser lokti ajaki Ao oshi zülumen liromedema amshitsü asoshi osangkaket, kentemnü aser lokti osang bentep ajak nung Ao Rijui amshiba aser sayuba zülumen dang amshitsü. Iba den, Aor lokti senden ajak nung Ao oshi agi dang jembitsüla.
iv) 2025 küm tetenzük nungi Mokokchung district Ao litsü kübok Government aser Private School ajak nung Ao sayutsüsa pei school sasep nungi Ao tesayur shimteta sayudaktsütsüla.

Sd/- Marsanen Imsong Tir

Sd/- Imtipokyim Tongti Zülur



Nov. 28, 2024 : Imran Khan-i aniba Tehreek-e-Insaf party pusemertemi pa apuba sülen longkak aitba noksa nung angur. Imran Khan pusemertem aika lir aser iba ajanga Shehbaz Sharif-i aniba sorkar anakshija arudar, ajisüaka Pakistan nung tatembangbuba telemtetba ya Army-i agir. Taoba PM ya taoba küm August ita nungi tepuokdak yua lir aser pa anema ken o 150 dak tema benoka lir.

Gaza nung kibong ka nungi nisung 9 tepset

Gaza City, Yimpoksüi/ November 28 (Agencies): Israel military-i Gaza Strip kübok tesem balala nung nisung aliba ki, public facilities aser infrastructure tem amakba mapang Nuseirat refugee camp nung kibong ka nungi nisung teku tepsetogo.

Central Gaza kübok Deir el-Balah nungi Al Jazeera osangbener Hani Mahmoud-i Brehostibarnü ashiba agi, Israel ground force tem Netzarim Corridor atsülangshitsü atema inyaksangshidar. Iba 6.5km talang Corridor koba enclave teyongtsü nung Israel military-i amenoka lir, iba yagi north aser south Gaza lemdangtsür.

"Corridor atsülangshiba mapang parnoki tanungba nisung aliba kitem raksatsütsü jenjang agidar. Item kitem ya Palestine nung raratemi mitsa ama amshir ta Israel indang military-i shia arudar," ta Mahmoud-i ashiba den,

tenük kuli agütsürtemi item kitem nung nüburtem aika jenoka lir ta shiogo, ta shisem.

Gaza north len Beit Lahiya nung Israel nung indang jet temi anüng ajanga tanungba nisung aliba kitem amakba mapang nisung pezü tepsetogo, ta Mahmoud-i ashi.

South nunga Brehostibar anepdang Abasan jila nung Israel nung indang drone temi camp ka anasa Palestine nung civilian tem telok ka amakba sülen nisung pezü tepsetogo, ta Wafa news agency sangdong ka ajanga metetdaksü.

Item tesemtem amakba dak sendakba nung Israel indang army-i kecha telangzüba agüja mali. Yimya agi parnoki tesem balala amakba ya Hamas pur dak rangloker amaker aser takok tashi civilian tem metepsettsü meranger ta shia arudar.

United Nations-i iba ita

tetenzüklen ashiba agi, Gaza nung tepsetertem ya shilem 70 bo tetsür aser tanurtem ta jangjaogo.

UN agency for Palestinian refugees (UNRWA)-i social media sabang X ajanga ashiba agi, October tetenzüklen nungi November 25 nü tashi nung northern Gaza-i teyari bener yoktsü 91 ben merandangba Israel nung ketdangtsürtemi 82 benbo nokdanga liasü.

Israel aser Hamasa na rara tetenzükba sülen Palestine nung 44,282 tepsetogo aser 104,880 dak tema yiruogo.

Iba rara tembangdaksütsü atema tangatettep ka dangi maruteti lir, ajisüaka United States-i ashiba agi, parnoki asendenshir jenjang talila agitsü.

Israel aser Hezbollah na tsüngdabo Bodhbarnü nungi tetenzüka ceasefire benokogo aser Brehosibarnü kecha timtem lendong mataloki liasü.

Syria nung military aser telungpur khatep; nisung aika süogo

Damascus, Yimpoksüi/ November 28 (Agencies): Aleppo province nung Syria army aser telungpurtem aika tepsetogo, kong Hay'et Tahrir al-Sham (HTS) telungpurtem aser allied force temi Syria tir Bashar al-Assad indang military-i azüoka aliba tesem ter shi atsüngtokogo.

UK nung amendaker aliba Syrian Observatory for Human Rights (SOHR)-i ashiba agi, Bodhbarnü telok ana tsüngda khatepba sülen telungpur aser sepa 132 tepsetogo. HTS-i meita aoba sentong ka benokba sülen iba mangatettep adoka liasü. Parnoki northwestern Syria tuluba ka amokbanger lir.

Observatory den inyakba activist temi ashiba agi, HTS züngsem 65 den allied armed

teloktem nungi züngsem 18 aser sorkar sepa 49 süogo aser telungpurtemi prangbong injang ayudak, armoured garitem, machinery balala aser hadir tulutem azüokogo.

Iba monitoring telok yagi ashiba agi, telok ana tsüngda mangatettep adokba mapang tanur densema civilian tema tepsetogo aser yiruogo. Raraba mapang Syria army-i nüburtem aliba aser telungpurtem amenoka aliba aser tesemtem nung injang aser missile noklang aika khaloktsüogo.

Military sangdong ka ajanga ashiba agi, kiralongrtem aikati medium aser heavy weapon tem amshia yimtsüng, jila aser military tamendakdak balala makogo, ta state news agency SANA-i metetdaksü.

HTS telungpurtem aser parnok den sendaktepa aliba teloktem nungi sepaitem Aleppo yimti tezülen nungi km 10 shi tejakdangia ao aser Nubl aser Zahra jila km ishika agi dang metongi oa liasü, kong Iran-i teyari agütsüba Hezbollah telok kanga tashi ita amenoka lir, ta Syria army source kati Reuters news agency dang ashi.

HTS telungpurtemisa Aleppo anütoklen al-Nayrab airport amak, kong Iran den sendaktepa aliba telok sepaitem outpost amenoka lir.

Syria nung official state media-i, raratepba indang kecha osang magütsü, saka pro-government website tem ajanga army-i HTS pur tesepe balala maka sepaitem aika tepsetba metetdaksüogo.

GOVERNMENT OF NAGALAND DIRECTORATE OF HIGHER EDUCATION NAGALAND: KOHIMA. NO.HED/SCHO/2022-23/182 Dated, Kohima, the 28th Nov. 2024. HIGHLIGHTS OF REVISED GUIDELINES, POST MATRIC SCHOLARSHIP FOR ST STUDENTS (Effective from 2023-24). 1. Change of Category/Group: Table with columns Group, Courses, Remarks. 2. Ministry of Tribal Affairs Letter No. 20014/23/2018-Sch, Dated, 19 Sept. 2024 stated, "All fresh or renewal students are eligible for a stipend upto a maximum period of 10 months in a year" only. 3. The Scheme Implementing Agency of Post Matric Scholarship for ST Students has initiated the payment of the 2nd instalment as per the sanction given by the Ministry of Tribal Affairs, Govt. of India. 4. Beneficiaries who have not received their 2nd instalment till 1st Dec. 2024 due to bank account issues may send their active bank details through the given link- https://forms.gle/vSvVWCfgZuYL4nSv8. Note: The complete set of guidelines can be viewed/downloaded from the Ministry of Tribal Affairs website: tribal.nic.in. Sd/- (V. LOVITOLY SEMA), NCS Ex-officio Director Higher Education, Nagaland: Kohima.



Union Minister Kiren Rijju aser India tsürtem ronungi Javelin throw nung mezüngbuba Asia games nung gold medal angula Annu Rani na sensaksemba mapang tangokba noksa nung angur. Patiala nung Federation Cup asayaba mapang tetsür javelin throw nung nület meter 63.24 tsüteta national record tasen ka yangluba atema Kiren-i Rani nem tenüngsang agüja liasü.

Champions Trophy ayongzüka asayatsü Pak mulungteter lir

Yimpoksüi/November 28, 2024 (Agencies): Pakistan Cricket Board's (PCB) mendenbuba Mohsin Naqvi-i ashiba agi, International Cricket Council's (ICC) board senden nung pai Pakistan atema takokba tashi telemtetba tajung agitsü. Iba senden nung Champions Trophy 2025 ayongzüka asayatsü atema tatembangbuba telemtetba agitsü imlar.

February 19 nungi March 9 tashi iba asayamung ayongzüka asayatsü Pakistan renemer lir, ajisüaka India-i Pakistan nung oa asayatsü memulungba sülen tetsükdaktsü adokogo.

Naqvi-i ashiba agi, PCB-i "hybrid" model magizüktsü, kong India team asayatem ajak neutral venue ka nung asayatsü. Paisa, asayamung ajunga ya Pakistan nung dang asayatsüla ta shiogo.

"Champions Trophy Pakistan nung ayongzüka asayatsü," ta PCB tekolakba yagi Gaddafi Stadium, Lahore nung osangbenertem den sensaksemba mapang ashi.

Onok tamendakdak

masetshi-i lir. Hybrid model ka magizüktsü aser Pakistan atema kechi tajungba aji inyaktüsü," ta pai ashi.

Iba ita tetenzüklen Board of Control for Cricket in India (BCCI)-i, ICC dang sorkari tetuyuba agütsüba sülen India team Pakistan-i motettsü ta shiogo.

Küm aika India sorkari national cricket team Pakistan-i aotsü temelaba magütsü arudar, kechiyong kidanger linük ana tsüngda yimden yimsüsüba nung mangatettep lir.

2008 küm nungi tang tashi nung India team Pakistan-i khendanga oa asaya mali aser linük ana ya international asayamungtem nung dang asaya arudar.

Iba ajanga ICC asoshi tetsükdaktsü adokogo aser ken o bentettsü asoshi Hokolbarnü board züngsemtem ajak senden ka ayongzüko.

ICC-i India asayatem United Arab Emirates (UAE) mesüra tanga tesem ka nung asayatsü ashitsü akok, ajisüaka Naqvi-i ashiba agi, Pakistan-i hybrid model ka atema senotsü

teyari agütsüba magizüktsü.

"Iba ya tim masü. Onokbo India-i oa cricket asayar saka parnokbo Pakistan-i marur," ta pai ashi.

"Kechi südir süang ajak liromedema inyaksangshitsüla aser onoki ICC nem onok tamendakdak jangja jangja metetdaktüsügo," ta paisa shisem.

PCB-i taoba mapang ICC dang, BCCI-i kechi kuli ajanga Pakistan-i aotsü memulunger iba indang shita copy ka meshia liasü.

Parnokisa iba ken o ya Pakistan sorkar den ashishitepogo aser Mohsin-i ashiba agi, sorkari kechi shidir iba sülen board anidaktsü.

Champions Trophy ya 1996 küm sülen Pakistan nung mezüngbuba professional men's ICC asayamung asütsü.

Paksitan-i ayonga Asian Cricket Council's (ACC) Asia Cup 2023 küm asayaogo, ajisüaka India team asayatem Sri Lanka nung oa asaya liasü, kechiyong sorkari team Pakistan-i aotsü temelaba magütsü liasü.

Luis Suarez-i Inter Miami den tenangzüktepba yanglushi

Yimpoksüi/November 28, 2024 (Agencies): Taoba mapang Barcelona aser Uruguay team striker Luis Suarez-i, Major League Soccer club Inter Miami den ano küm ka atema tenangzüktepba yangluogo aser pa club indang coach tasenba Javier Mascherano kübok taruba season asayatsü, ta club sangdong ka ajanga metetdaktüsü.

Arishi küm 37 tain asayar yagi club nung adenba sülen iba season metenzük tsüngda tetoktepa ajak nung goal 25 idaktsür lir, kong regular season campaign nung otsüsüsüsa goal 20 idaktsüba densema lir.

Regular season nung record tajungtiba atema Supporters' Shield akokba sülen Miami pur ya playoffs nung Atlanta United puri mezüngbuba round nung tsükdakja liasü.



Argentina head coach Gerardo Martino-i club toktsüogo aser iba sülen taoba mapang Braca nung külem team-mate Mascherano head coach asütsü shimogo.

"Ni ano küm ka asayatsü jangradema aser pela bilemer. Fan tem den tensendaktep tajung lir koba onok atema kibong ka ama dang lir. Onok parnok den kanga junga sendaktepa lir aser taruba küm parnok nem tepela timba bener arutsütsü imla atar," ta

Suarez-i ashi.

Miami indang football operations tir Raul Sanllehi-i ashiba agi, Suarez-i ya temaba jenjang nung asayaba forward ka dang masü saka team nung kanga tongtibang asayar ka lir.

"Luis ya taküm onok asayatem rongnungi goal timtiba idaktsüba asayar dang masü saka ozü telok lenir ka lir," ta pai ashi.

Suarez-i September ita pa Uruguay national team nungi international asaya nung ojang dang asayatsü telemtetba agiba sangdonga liasü. Pa linük team nungi asaya 143 nung asayaogo aser iba mapang goal 69 idakja liasü.

Forward asayar ya Europe nung Ajax, Liverpool aser Atletico Madrid nungia asayaogo aser Miami nung maden tsüngda Brazil nung Gremio nungi asaya liasü.

Mirabai Weightlifting World Championships nung masayatsü

Yimpoksüi/November 28, 2024 (Agencies): Tokyo Olympic silver medallist Mirabai Chanu, taruba hopta Manama, Bahrain nung asayatsü aliba weightlifting World Championships nung masayatsü telemtetba agiogo, kechiyong la tang temang anepaluba mapang lir.

Arishi küm 30 tain taoba mapang world champion ya August ita Paris Olympics nung tetsür 49kg category nung pezübuba nung tembangba sülen tang tashi khen danga asaya mali.

"Paris Olympics sülen Mira tang tashi nung rehab nung lir. La iba World Championship nung masayatsü," ta chief national coach Vijay Sharma-i PTI dang ashi.

Taoba küm Asian Games asayaba mapang hip yiruba sülen Chanu Paris nung asayatsü atema temang anepalua liasü. La Olympics nung asayaba mapanga la fitness dak sendakba nung tashishiba aika liasü.

Lai tang tashi nung Asian Games nung medal ka danga monguteti lir aser iba medal angutsü atema la mulungteter lir.

"La kanga junga taneptsü



angutsü kanga tongtibang, kechiyong onok 2026 Commonwealth Games aser Asian Games atema renemshi tenzüksüla," ta Sharma-i shisem.

Chanu masayaba mapang Commonwealth Championship gold medallist Gyaneshwari Yadav-i anir India nunger asayatem World Championships nung asayatsü, koba December 6 nü tenzüksü.

Arishi küm 21 tain asayar ya 49kg weight class nung asayar.

Commonwealth Games silver medallist Bindyarani Devi (55kg) aser national championship aser Khelo India Weightlifting League gold angusang Ditimoni Sonowal (64kg) nata iba asayamung nung shilem agitsü.

Parnok asem ya tang Patiala nung national camp nung lir aser taruba hopta Bahrain-i aotsü

Frank Lampard Coventry City head coach kümogo



Yimpoksüi/November 28, 2024 (Agencies): Taoba mapang Chelsea coach aser England nunger nungtuogo asayar Frank Lampard, Bresthobarnü Championship club Coventry City indang head coach asütsü shimogo.

Chelsea indang interim coach inyakba sülen 2023 küm June ita nungi club ka nung danga medeni arur arishi küm 46 tain ya maneni coach mapa atema meyipa aruogo.

Chelsea nungi nungtuogo asayar, shiba 2018 küm mezüngbuba Derby County coach mapa inyaka liasü, pa 2019 küm Chelsea nung inyaktüsü atema maongka angu, ajisüaka pa 2021 küm tom nung mapa nungi anenja liasü.

Stamford Bridge nung pa melena Thomas Tuchel shim aser pa lenisüba nung club-i UEFA Champions League koka liasü.

Iba sülen 2022 küm pa Everton coach aküm aser

parnok relegation nung aliba nungi aniteta liasü, saka 2023 küm team-i junga masayatetba sülen pa mapa nungi anentsü aser Sean Dyche shima liasü.

Maneni 2023 Tuchel den pilaba sülen Lampard interim manager ama Chelsea-i meyipa oa liasü.

Mauricio Pochettino club-i maru tsüngda Lampard-i tawa süngja ata ajisüaka Pochettino-a Enzo Maresca-i melenogo.

Coventry kibur Doug King-i ashiba agi, temaba jenjang nung takok angutsüba atema kechi nungdaker aji Lampard-i jangja jangja meteta lir.

"Head coach ama onük club nung adentsü atema Frank Lampard-i mulunga agizükba atema ni kanga pelar," ta King-i ashi. King-isa, Derby nung Lampard inyakba indang jemi aser ashiba agi, taoba mapang England midfielder yagi championship nung tetsükdaktsütem ajak jangja lir.

"Frank-i Championship nunga shilem agiogo aser iba league nung takok angutsü atema kechi nungdaker aji jangja lir," ta King-isa shisem.

"Iba sülen Chelsea aser Everton nung tajangshibatem ajanga, temaba jenjang nung takok angutsü atema kechi nungdaker aji pai angateta lir," ta paisa shisem.

BILEMDANGANG

"Nai kechi langa ali aji dang angutsü."